

Colossas anuabu Paulõ hatu kene bumanikiaki COLOSSENSES

Paulõ hatukiri xinānikiaki, na hātḡarā

1 ¹Ea ē Paulorā, Deusū hawē xinānē Jesus Cristõ hawē kuxipaya ea wakī ea katuniwē taeshū nukū betsa Timóteobetā ²tsuabura Colossos mae ewapa anuabu Deusū hawenabu meribi matu wani mā nukubetā Cristo ikūwai mā txītuīsmakē habetā ē hātḡa ē matu bumai uīrakāwē. Nukū Epa Deusū hau matu unānuma hiwemakī duawakī hau matu xinā txākāwākubainūwē.

**Jesus Cristo ikūwaiḡu Paulõ hatu xinākī hatuwē taeshū
kēwākī Deus hatu ea ashūkubainikiaki, na hātḡarā**

³Matukiri xinākī nukū Shanē Ibu Jesus Cristõ Epa Deusbe hātḡakī matu yukashūkī nū matukiri kēwākubaīmiski. ⁴Matukiria kaka huai ē nīkamiski, mā Jesus Cristo ikūwai nukubetā ikūwaiḡu betsa hatube abunamei mā hatuwē nuimis nīkairā. ⁵Mā haskairā, Jesus Cristokiri kakape txanima nīkatā benimakī matū hiwea nai anu Deus anu mā haya mā manakaibu nū matu unaiī. ⁶Haska inū, mai hirabi anushū Deusū kakape hawē bakekiri nīkatā ikūwābauni pakī yurabū hatu uīmabaunaibu keskai mā ikairā, txanima habias habiaskari matu anuri tashniai mā hayaniki, haska Deus duapakiri hātḡaibu nīkai: “Txanimaki”, itā mā ikūwāniburā. ⁷Mā haska ikaiburā, nukū haibuhaira Epafrasī nuku keska Cristõ tsuma nukube dayakī matu anushū txītuāma matu nuku yusīshūkubaīmisi ⁸hatū matukiria kaka beshū nuku yuikī haska Yushī Papatū matu merabewakī amai mā abunamei nuiabu nukuki txanixinaki.

⁹Haskawē taea mā abunameaikiri nīkatā Deusbe hātḡakī nū matu yukakī heneshuīsmaki, Deusū hau hawē xinā shabakabi matu unāmākī

haskai unãnepati tibi inũ nĩkati xara matu wamakĩ hawẽ Yushĩ Papatũ hau matu inãmakĩ unãmakubainunã. ¹⁰Mã haska habũ nukũ Shanẽ Ibu txibaĩbunã, haskai hiwekĩ haska abuai benimawakĩ ashũkubaĩkãwẽ. Haskakĩ yura betsabu uĩmakĩ hawara daya pepa betsa betsapa akĩ Deuskiri tapĩ unãnepai ewakubaĩkãwẽ. ¹¹Haska inũ, eska ẽ matu yukashũmiski. Deusũ hawẽ kuxipa paepawẽ hau matu mestẽwanũwẽ. Haska kuxipa mã hayawẽ taeshũ hamapai bika tenebiai kuxipata hĩ hĩ ikama inũ benimakĩ ¹²Epa Deus kẽwãkubaĩkãwẽ. Hatũ matu katunishũ ikũwaĩbu dasibibube nuku mekekubaĩkĩ nai anushũ hawara nukuki tanani nuku inãkuĩa hawẽ shabaki pesetã nũ bishãkanaii. ¹³Uatiã nũ Deus unãma mexu txakabũ nuku tsumabiakẽ Deusũ nuku putamaniki, hawẽ bake ha abuaitũ hawẽ shanẽ anu nuku iyukinã. ¹⁴Cristo mawakĩ Satanãsã nuku tsumani hawena wakĩ nuku mebikinãtã nukũ txakabu nuku buashuniki, ana xinãmarã.

**Cristo nuku mawashuniwẽ taeshũ Deusũ hawenabu
hawẽ meketi wanikiaki, na hãtxarã**

¹⁵Deus tsuã uĩtirumabiakẽ Cristo ha itsa shabakabi uĩkubainibuki. Hawa dasibi dami wariama hawẽ bake kayabi bestitxai hayaniki. ¹⁶Cristowenã, Deusũ dasibi nai anua inũ mai anua nũ uĩturu inũ nũ uĩtiruma yushĩ betsa betsapa kuxipayabu inũ paepabu Cristowẽ damiwanikiaki. Haska damiwakinã, Cristowẽ taeshũ atã Deusũ Cristo hawena wamaniki. ¹⁷Haska inũ, hamapai betsa betsapa Deusũ damiwariama Cristo hiwepaunikiaki. Hawẽ taeshũ dasibi damiwanishũ pewakĩ keyunishũ heneama mekekubaĩmiski. ¹⁸Ha dikabi Cristo hawẽ hiweawẽ nukũ Shanẽ Ibushanũ ika kuxipai hawẽ bushkai nuku ishuniki, nũ ikũwaĩbũ hawẽ yura nũ ishanũbunã. Ha dukũ hiweniwẽ taea mawamisbu kuxipa binui ha dukũ mawabu anua besteĩ taekĩ dasibi hatũ dukũ binu keyuniki. ¹⁹Deusũ hawẽ bake haska wakinã, ha hawẽ kuxipa inã keyukinã, haki dasibi txiti iyukatsi anikiaki. ²⁰Haska inũ, Jesus cruzkia mawai hawẽ himi nuku habashuniwẽ taeshũ nukũ txakabu Deusũ buashũ hakimakĩ nuku hakimawatã ana nukuki sinatakatsi ikama Deus nuku daewamakĩ hawẽ haibuaibu nuku wamatã hiweabu mai hirabi anu inũ nai anu Cristoki dasitã hanus nuku shukuwakatsi Deusũ hatu dasibi pewakĩ keyukĩ daewanikiaki, yurabu inũ yurabumarã.

Cristõ Deus nuku daewamanikiaki, na hãtxarã

²¹Maturã, uatiã hawa unãma matũ xinãnẽ matũ huĩtinĩ txakabu abukĩ akirã, txaihaira hiwea keskashũ Deus mã sinatamapaunibuki. ²²Hamẽ natianã, Deusũ bake Cristo ma huni hawẽ yurawẽ nuitapatã matu mawashũkĩ hawẽ mawawẽ Deus matu daewamashuniki. Haska matu wakinã, hawẽ besuuri hawa txakabuma inũ hawa mexu tsamiama

inũ tsua txakabu matuki txanitiruma matu nitxĩkatsi iki matu ishuniki. ²³Mã haskakatsi ikairã, matu tibirã, Deusũ kakapekiri nĩkatã mã ma Cristo ikũwãni henekĩ putai txĩtuãma huĩti mestõtã haska mã ikũwaĩbu manakakubaĩkãwẽ. Haska Deusũ hawẽ bakekiri hawẽ kakape yurabu mai pakea itxapa anuabũ hau unãnũbũ yusĩkĩ ea ẽ Paulõ ẽ hatu merabewakubaũmiski.

Paulõ ikũwaĩbu uĩyamabia hatukiri nuikũkainikiaki, na hãtxarã

²⁴Natiã matuwẽ taea nuitapairã, ẽ benimaii. Hau hawẽ taea nũ bika tenekũkaĩshanũ Cristõ nuku yunutã ha dukũ txanima hawẽ yurawẽ ha ikũwãshanaibu merabewanũ ika hatu bika teneshũkĩ haskawẽ taea eari ibubis ẽ yurawẽ mnei ẽ ishũriaii, mã ha ikũwaĩbuwẽ taeãrã. ²⁵Ha inũ, Deusũ hãtxarã, dasibi hiwebaunabu ẽ hatu yuikubaũshanũ ea katutã ea yununi haskawẽ taea mã Cristo ikũwaĩbu matuwẽ nuikĩ ẽ matu merabewakubaĩshanũ Deusũ hawẽ tsuma ea matu washuniki. ²⁶Na haska ẽ matu yuiãrã, Deusũ hawẽ kakape Cristokiri bari itxapahaira huneni yura betsa betsapa bari betsatiã hiwekubiranibu hatu yusiãma hunenishũ natiã habu Cristowẽ Deusũ meribi hatu wairã, Deusunã, ma shabakabi nuku uĩmaikiki. ²⁷Tsuabura mã judeubuma Deusũ hawẽ xinã duapa haska bebũkiri Cristokiri yubakabiatã huneni ha shabakabi wakĩ matu unãmakatsis ikikiki, hau mai hirabi anuabũ matũri mã unãnũbũ haska ha hawẽ xinã dasibikiri hunenirã, harã, Cristo aniki. Haska matũri mã Cristo ikũwaĩwẽ taea mã judeubumabia Cristo ma matuki dasiaki. Haska inũ, nai anu Deusũ mae pepahaira anu Deus inũ Cristobe maturi mã hiweshanaii, mã haskakiri xinãkĩ manakaiburã.

²⁸Haska Cristokiri matuki txanikĩ matu yusĩkĩ nema pewakĩ dasibi matu unãnepa wakĩ haska Cristo bebũ mã pepa mapushanũbũ nũ matu yusĩmiski. ²⁹Na haska matukiri dayairã, Cristõ hawẽ kuxipa ea inãni ẽ hawẽ dayatxakayamashũmiski.

2 ¹Mã ikũwaĩbu Colossos anuabu inũ habu Laodicéia anuabu inũ dasibi betsabube nũ uĩnanãriabumabia matuwẽ nui ẽ dayatxakayamamis mã unãnũbũ ishũ matu xinãkĩ ẽ matu yuiãii. ²Hau mã xinã txãkaĩ henetima binũbũ inũ, hawa betsa xinãma ikũwaĩ betsabube ketashamei nuinamei mã abunamenũbũ inũ, unãnepakĩ Deusũ hawẽ yuba betsa huneni Cristokiri natiã hau shabakabi mã nĩka pehairawanũbũ ẽ matu dayai heneshunamaki. ³Eskaki, matu yuinũ xinaĩrakãwẽ. Hawẽ unãnepati pepa inũ hawẽ tapĩti dasibirã, Cristo anu hayaki, haska Deusũ hakiri hunenirã. ⁴Haska matu yuikinã, hau ana tsuãra yusiã betsawẽ ana matu parãyamanũbũ Cristo besti unãnepahairakiri ẽ haska matu banabimaii. ⁵Haska inũ, ẽ yura ẽ matubemabia ẽ xinã matu anuki. Mã ma Cristo ikũwãnishũ hawẽ daya ashũkĩ txibãkubaĩkĩ mã pewai mã ma pekẽ matuwẽ nui ẽ benimaii.

Cristokiri ikūwaī xinā betsa wanibukiaki, na hātẓarā

⁶Haskakē mā ma Jesus Cristo ikūwākubainaiburā, matū Shanē Ibu Cristo hiweshunirā, haska abuai keska ishūkubaikāwē. ⁷Haska matu yusūmisbu txibākī bari tibi heneama ana uke merā ikūhairawakubaikī Cristokiri tapiī ewakaikī matu pepawaikiri Deus kēwākubaikāwē.

⁸Huni betsabū hatū yusīa beya betsawē matu unānēpa wapai matu hatu txibāmakatsis ikaibu hatū yusīa pe itsa kayatapiamaki. Uīrakāwē, tsuabūra Cristō yusīa danākī hakiri xinaī hātẓashunabumakirā. Hakia habu ikirā, na mai anushū yushī kuxipabū yunuai txibākī yusīa betsā ani hawē yusinanaī kanenibu txibākī matu amakatsis ikubaikanikiki, haska habu yusīnanākinā.

⁹Cristorā, Deusuna hasbia nukū yura keskatā na mai anu uīti xarai tashnikiraniki. ¹⁰Cristo mā ma haki dasitā ikūwaīburā, Cristona dasibi mā hayaki, Deusū hawē kuxipa habiasri ināniwē taearā. Ha dikabi yushī dasibi inū, nai tsuma pepa inū, txakabu dasibi inū, shanē ibubu mai anua shanē ibuhairakī hatu binu keyuaki. ¹¹Hamē, betsarā, Abraão Deusū yununi txibākī Deus unāmanū, iwanā, judeubū hatū huni bake kaiyā hatū hina kubitxi meshtemisbu keska wakī natiā mā judeubumā Cristo mā ikūwaību matu haki dasiwakī matū hina kubitxi meshtea keska wakī matū xinā txakabu inū matū beya txakabu Deusū meshtea keska wakī matu putamaniki, xinā betsa wamakinā. ¹²Haska inū, Cristo mā ikūwāyā yura betsabū hatu unāti wamai mā naxiniburā, eska tibi hawē xināmatiki. Nīkairakāwē. Naximakī matu henē bitxiaburā, Cristobe matu mai wanibu keskaki. Hanushū hene anua matu benibirākī tashnimakī kaīmaiburā, Cristobe besteā keska wakī matu akawanibuki, haska wakī Deusū hawē kuxipawē Cristo bestēwani ha kuxipa mā ikūwaīwē matu imakinā. ¹³Hamē uatiā matu hiwearā, matū txakabu mā heneriamawē taearā, mā mawa keska hiwenibuki. Hakia natiā tsuabūra Cristo mā ikūwaību dasibi matū txakabu Cristowē matu buashuniwē taeshū Deusū Cristoki ma matu dasiwatā hawē taeshū hawē hiwea kayabi matu ināniki. ¹⁴Haska wakī hawē yunua inū hawē nema Deusū nukubukiri mese wanishū hawē nukū txakabu tibi Deusū tanakī netākubainishū hawē taeshū Deusū nuku kupitirubiakē ha binumai Cristo cruzkia nuku mawashūkī nukū txakabu mastakī nuku bepu keyushuniki. ¹⁵Cristo mawa Deusū ana bestēwaniwē taeshū hatu uīmakī Satanás inū hawē tsumabū kuxipa Deusū mebīmakī hatu maematā hatu dakewakī keyumaniki, yura dasibi habukiri shabakabi unāmakinā.

¹⁶Judeubu hatū beya tibi hayabuki. Haska inū, hatū beya betsa txibākī piti dasibi pitirubumabia piti betsa besti pitirubuki. Haska inū, hatū beya betsa txibākī hawē nushuti betsa atirububia betsa atirubumaki. Haska inū, hatū beya betsa txibaī itxatā besi betsa betsapawē besimisbuki, ushe

benatiã inũ huĩrukũti sãbado tibitianã. Haska tibi txibãkĩ amisbunã, hau matukiri haska xinaĩ ha iyamakubainũbũwẽ. ¹⁷Na beya betsa betsapa tibiwẽ hawẽ Cristokiri xinãmati besti ikubainibuki. Hakia Cristo ma hunikẽ ha beya ana kuxipa hayama hamẽki. ¹⁸Haskakẽ tsuabura pepa kayabitikiri xinaĩ keĩsbuma inũ, tsuabũra nai tsumabu kẽwãmisbu inũ, haskamabia usha namai keskakĩ hawara tashnikiranai shabakabi uĩ hatũ xinã merã keĩ xinã txãkãmisbuki. Haskamisbũ hau habũ matu txitekĩ dakewayamanũbũ uĩrakubaĩshãkãwẽ. ¹⁹Ha habu haskamisburã, Cristorã, hatũ bushkamaki. Hamẽ nukuburã, nukũ bushkarã, Cristoki. Haskakẽ nukũ yura ewakaini pitiwẽ nũ kuxipamis keskariai habũ nukũ Shanẽ Ibu Cristo ikũwaĩburã, pabu tibi haki dasikĩ nũ ewawairã, hawara nũ unãriama tapĩmakĩ haska Deus yubakani Cristõ haska xinãki nuku amaikiki.

Cristobe nũ hiweshanairã, hunibũ yunua keskamakiaki, na hãtxarã

²⁰Tsuabũra Cristo mã ma ikũwaĩburã, mã ma Cristobe mawani keskabuki. Haskawẽ taeshũ na mai anushũ shanẽ ibukĩ hatũ kuxipawẽ beya betsa betsapa yunuaibũ ana habũ matu tsumatirubumaki. Haskabia haskai ikũwãbumabe hiweshũ habũ matu yunuai nĩkakĩ mã txibãkĩ heneriabumamẽ, habu keskakinã? ²¹Habũ yunua eska txibãkinã: “Ha meyamawe”, ikaibu inũ: “Ha piyamawe”, ikaibu inũ: “Ha mĩ mekenẽ meyamawe”, imisburã, ²²haska tibi hatũ yunuarã, hunibũ haska xinãki hatu yusĩmisbu besti akaiburã, ha mabu inũ ha pitikiri matu yusĩki unãmakĩ tapĩmaiburã, hawẽ hiwekubainai bu hawaira keyushanikiki. ²³Ha haska txanima keska wakĩ yusĩnanãmisburã, unãnepakatsis ikĩ yusĩa bena bika ibubis yusĩki txibãhairakĩ hatũ hiwea pe mekekatsis ibiai tsuã hawẽ xinã txakabu nemakĩ henetirumaki. Haska akinã, haska abuaibu besti hatũ xinãwẽ besti kuxipakĩ yuikubaĩmisbuki.

3 ¹Cristo mawa bestẽwãtã Deusũ hawẽ yusiuri tsaumanishũ habe shanẽ ibu waiwẽ taeshũ matũ xinã betsa watã mã ma ikũwaĩbu mã ma habe besteni keskawẽ taea hawara naiuria Cristowẽ Deusũ pepa benakubaĩkãwẽ. ²⁻³Cristobe mã ma mawani keskawẽ taeshũ matũ hiwea Deusũ nai anu matu mekeshunaki, hari Cristobe mã hiweshanai anurã. Hanua na mai anu mã hawẽ hiwea mabukiri besti xinãma Deusũ haska abumiskiri xinãkubaĩkãwẽ. ⁴Haskawẽ taea Cristo shanẽ ibui benima paeya ana huaya maturi habiaskariai mã habe benimatxakayamashanii. Cristorã, habia matũ hiwea kayabiki.

Cristoki dasikatsi hiwea bena katutikiaki, na hãtxarã

⁵Haskakẽ na mai anua matũ kemurã, tenãki akawarikãwẽ, eska tibi Deusũ nemani heneirã. Ana aĩbu betsa tibiwẽ kemuama inũ, ana hamapai tibibe txutanamebaunama inũ, hawara kemu atimapa betsa betsapa

mã akatsis ikai inũ, ana pei inũ mabu betsa itxawanũ, iwanã, yauxikĩ kēwāti betsa keska wakĩ pei inũ mabuwē kemukĩ kēwāyamakubaĩkãwē. ⁶Hakia haska tibi txakabu aki mã Deus nĩkama sinatamamiski. Hawē taeshũ ha nĩkaisbuma Deusũ hatu kupihairashanaiwē taea ⁷txakabu habiaskari matũ hiwea sheniwē mã abiapauni ⁸natiã ana haska meama menã hawaira dasibi hene keyurikãwē, mã eskamistrã, mã sinatamistrã, mã kemumistrã, mã txakabu wamistrã, mã sheti ikama kũyã imistrã, sherabiãma mã hãtxa txakabu yui shetxakamistrã, ⁹mã txani txakamistrã. Natiã haska tibi mã ma heneamēkaĩ, matũ hiwea shenirã. Haskakē ana haska Deusũ abuama txakabu tibi ayamakubaĩkãwē. ¹⁰Tari bena sawea keska wakĩ matũ hiwea mã ma benawaki. Matũ hiwea ma benawairã, haska Deusũ abumis keska hiweshũbaĩkãwē, hatũ matu damiwani keskairã. Haskakĩ itxapa mã hakiri unãshanai. ¹¹Mã ma haskarã, tsuabũra Cristo ikũwaĩbu hawenabukiri eska xinaĩ mã hãtxatirubumaki, Gregonawaburã, judeuburã, habũ judeubũ beya txibãkĩ habũ hina kubitxi meshtemisburã, habũ judeubũ beya txibaĩsbumarã, nawa shukuabu tibirã, pubēburã, habũ habu dayashũmisburã, tsuã tsumamarã. Nũ haska betsa betsapabubia haska xinaĩ hatukiri hãtxayamakubainãkãwē. Cristorã, dasibikirã, dasibibũ shanē ibui keyuaki.

¹²Haskakē Deusũ matu abukĩ hau hawenabu meribi tari mã inũbũ matu katunikenã, matũ xinã pepa kaĩmakinã, tari bena sawea keska wakubaĩkãwē, yura betsabuwē nuirã, pepairã, babutã keãmarã, duapairã, hĩ hĩ ikama manakairã. ¹³Haska inũ, tsuabũra matu txakabuwaya hawaira haki sinatama tenetã merabenaĩ hatũ txakabu hakimatã ana hakiri xinãyamakubaĩkãwē, nukũ Shanē Ibũ matũ txakabuwē Deus matuki sinatai buashuni keska wakinã. ¹⁴Haskakē na yusã haska tibi dasibi txibaĩ abunamei heneama inũ putanameama pepai mã hiwekubaĩtirubuki. ¹⁵Hakia Cristõ unãnuma matu hiwemayarã, ha matũ huĩti uke merã shanē ibu wamakãwē. Matu haska wakatsi ikĩ Deusũ ma matu katunishũ habias yura matu wakatsis ikikiki. Dasibi ma hatũ matu ashuni xinãkĩ kēwãkubaĩkãwē.

¹⁶Matubunã, Cristõ kakape hiwetikiri itxapa mã ma tapianã, heneama akubaĩkãwē. Eskairã, hawē yusinanaĩnã, hawē unãnepakĩ betsabũ kaneaiubu hatu ha akĩ pewakubaĩkinã, matũ huĩti benimai xinã txãkãkĩ: “Peki”, ikĩ Deus kēwai Deuskiri nawati betsa betsapawē nawakubaĩkãwē. ¹⁷Hawara tibi mã akai inũ mã yuairã, nukũ Shanē Ibũ haska abui keska hawē kuxipawē akubaĩkãwē, nukũ Epa Deus: “Peki”, akinã, mã Cristonabunã.

Ikũwaĩbu kayabi haskai hiwetikiaki, na hãtxarã

¹⁸Beneyabuũ, matu yununũ nĩkakãwē. Ikũwaĩ mã ma nukũ Shanē Ibuki dasiniburã, matũ benē hawarakiri matu hãtxa wai hawē hãtxa txibãkĩ nĩkasama ashũkubaĩkãwē.

¹⁹Aĩyābuũ, maturi yununũ nĩkakāwẽ. Matũ aĩ abui hatuwẽ nuikĩ hatu ha akĩ bikawayamakubaĩkāwẽ.

²⁰Bakebuũ, maturi yununũ nĩkakāwẽ. Nukũ Shanẽ Ibu benimawakinã, matũ ibubũ matu yusĩkĩ nemai nĩkakubaĩkāwẽ.

²¹Bakeyabuũ, maturi yununũ nĩkakāwẽ. Matũ bakebu tapĩmakĩ hau matuki sinatayamanũbũ yunutxakayamakĩ nemahairayamakubaĩkāwẽ.

²²Escravo dayarubuũ, maturi yununũ nĩkakāwẽ. Matubunã, matũ tsuma mai anuabu hatu duawakĩ matu uĩaĩbu inũ matu uĩabumakẽ haska bestiwakĩ hatu duawai xinãma hakia matũ huĩti pepawẽ hawara hatu ashũkinã, nukũ Shanẽ Ibũ kuxipaki mesekĩ hatu ashũkubaĩkāwẽ.

²³Hawara daya tibi mã hatu ashuainã, txikixbetanã hatu ashũama nukũ Shanẽ Ibu mã duawai keska wakĩ hatu ashũkubaĩkāwẽ, yurabu hatu uĩmakĩ ashũamarã. ²⁴Ha inũ, nukũ Shanẽ Ibu Cristo matũ yununika kayabitũ matu yunua nĩkakĩ mã ashũkĩ mã benimawamisrã, ana matu manakukĩ itxapa matu binumakĩ haska yubakani hiwekuĩa matu inãshanai mã ma unaiĩ. ²⁵Hamẽ tsuabũra txakabuwamisrã, hatũ txakabuwẽ Deusũ hatu kupishanikiki, yura betsa betsapaburã, aĩbuaiburã, huniburã, bakeburã, ibuburã, escravo dayarurã, yununikaburã. Haska washanikiki, betsa binumamarã.

4 ¹Yununikabuũ, maturi xinãmanũ nĩkakāwẽ. Nai anua matũ Shanẽ Ibu yununika maturi mã hayawẽ taeshũ matũ escravo dayarubu parãma hakia hatu duawakĩ piti inũ tari hatuki yauxiyamakubaĩkāwẽ.

**Ikũwaĩbu haskai hau hiwenũbũ Paulõ ana
hatu yununikiaki, na hãtxarã**

²Mã Cristo txibaĩbunã, hawara betsakiri mã xinaĩ Deusbe hãtxakinã, hawa txikixkĩ heneama apakekãwẽ, haskawẽ taeshũ Deusũ matu ashuã uĩkĩ kẽwai: “Peki”, ikũkainirã. ³Haska inũ, nukukiriri Deus nuku yukashũriakãwẽ, hau nukũ Shanẽ Ibũ nuku merabewaya hakiri hawẽ kakape Cristokiri Deusũ huneni shabakabi mae betsa betsapanu nũ hatu yusĩkĩ hatu unãmabaunũbunã, na haska hakiri ea nemakĩ bitxikĩ akawanibu ẽ niakirirã. ⁴Ha inũ, haska Deusũ abuai eã ẽ hatu shabakabi Cristokiri unãmakĩ ẽ hatu yusĩ kanũ ea yukashũrikãwẽ.

⁵Haskakẽ ikũwãbumabe mã hiwearã, hatube merabenaĩ pe hiwei unãnepakĩ hatu duawariakubaĩkãwẽ, Cristo mã ikũwaĩ haska bestikiri hãtxakĩ hatu ikũwãmakinã. ⁶Haska inũ, hatube hãtxai hãtxa duapa inũ hãtxa pepa bestiwe hãtxakãwẽ, haska yura tibibũ bika teneaidu hatu merabewakĩ hatu kemai hãtxai peirã.

Hatis hawẽ henekĩ Paulõ hatu keneshũ yununikiaki, na hãtxarã

⁷Nukubetã ikũwaĩ nũ habe abunamemis Tíquico txĩtuãma nuku merabewakĩ nuku keskakĩ nukũ Shanẽ Ibu dayashũmistũ ekiri kaka

matu bushūkī yui kaikiki. ⁸Haskawē taeshū matu anu ē nitxiaiī, nukukiri matuki txanikī hau matu benimawai kanunā, nū haska hiweabukiri txanikinā. ⁹Matū mae anuari nukū betsa nū habe abunameriamis txītuīsmari Onésimo Tíquicobe kaikiki, haska nenu Roma anushū haska xarabu nuku wabu nū hiweakiri ha dabe matuki txani bukanikikirā.

¹⁰Haska inū, Aristarco ebe bitximabū hawē hātxa matu bumariakī yuikī: “Deusū hau matu duawakubainūwē”, matu waikiki. Barnabē txai Marcōs habiaskari hawē hātxa matu bumariaikiki. Marcoskiri ē matu yuimaki. Hatiāra matukiri bakī matu yusī kaya ikī pewatā duawashākāwē. ¹¹Jesus hawē kena betsa Justō hawē hātxa habiaskari matu bumaikiki. Habu besti Israelī babā Deus dayashūkī ea merabewakī duawakī ea xinā txākāwākanikiki. ¹²Haska inū, Jesus Cristō tsuma betsa nukū haibu Epafras matube hiwemisrā, matuwē nuikī matukiri xinākī Deus matu yukashūkī heneama ikūkanikiki, hau txakabuuma mā hiweshū mestētā haska Deusū abuai dasibi haska xinaī keska mā ashuī hiwekubainūbū matukiri xinaīnā. ¹³Haska nukū haibu Epafras matu inū dasibi Laodicéia mae ewapa anuabu inū Hierápolis mae ewapa anuabu wē nuhairai ē hawē hātxa nīkamishū ē matu yuiaī. ¹⁴Huni dauya Lucas nū habe abunamemis inū Demasī hawē hātxa matu bumariakī yuikī: “Deusū hau matu xinā txākāwanūwē”, matu waikiki.

¹⁵Ha inū, nukū betsabu inū nukū puibu Laodicéia mae ewapa anuabu mā itxamisrā, matu xinākī ē hātxa ē matu bumaii. Ha dikabi nukū haibu Ninfa inū hawē hiwe anu itxamisbube ē hātixari ē matu bumariai. ¹⁶Na kene ē matu bumai uikī yuikī keyutā hanushū Laodicéia anu itxamisburi hatu yunushākāwē. Hanua kene betsa Laodicéia anu ē haturi bumai uītā maturi bemaibu matuna uiaībū hatunari uīshākāwē. ¹⁷Ha inū, Arquipo yuikī: “Nukū Shanē Ibu Jesus Cristō mia katushū hawē daya mia yununi hawa kaneama hau pe dayashūkūkaīnū”, ea yuīshūshākāwē.

¹⁸Na kene keyukinā, ē Paulō emebi ē mekenē ē hātxa matu bumakī ma ē keyuaii, hatū ea keneshūmistū akai mebītanā. Ea bitxikī akawashū ea neshayamabu ekiri xinākī heneama Deus ea yukashūkubaīkāwē. Nukū Epa Deusū hau matu unānuma hiwemakī pewakī duawapakekubainūwē.

Hatiski, ē hātixarā.

Paulo